

Մ. ՆԵՐՍԻՍՅԱՆ

ՀՈՎՍԵՓ ԷՄԻՆ

1

Հովսեփ Էմինը հայ լուսավորիչների սերնդի առաջին խոշոր ներկայացուցիչն է։ Նա միաժամանակ 18-րդ դարի երկրորդ կեսի հայ ազատագրական շարժման ամենափայլուն դեմքերից մեկն է։ Նրա դերը չափազանց մեծ է ինչպես հայ հասարակական-քաղաքական մաքի զարգացման, այնպես էլ հայ ազատագրական շարժումների պատմության մեջ։

Հակաֆեոդալական, բուրժուա-դեմոկրատական գաղափարախոսությունը հայ իրականության մեջ սկիզբ է առնում 18-րդ դարի 50—60-ական թվականներից։ Հայ լուսավորական այդ իդեոլոգիան, սակայն, ծնունդ առավ ու ձևավորվեց ոչ թե Հայաստանում, որը 18-րդ դարում գտնվում էր խիստ հետամնաց սուլթանական Թյուրքիայի և շահա-խանական Իրանի (Պարսկաստանի) բիրտ ու դաժան տիրապետության տակ, այլ հնդկահայ դադուկում, որն անհամեմատ ավելի բարենպաստ նախապայմաններ ուներ առաջավոր գաղափարախոսության ստեղծման ու ձևավորման համար, քան բուն Հայաստանը։ Հայ լուսավորական, բուրժուա-դեմոկրատական գաղափարախոսությունը ձևավորվեց երոպական, մասնավորապես անգլիական առաջավոր մտքի ու հոսանքների ազդեցության տակ և 18-րդ դարի երկրորդ կեսում տվեց երեք նշանավոր լուսավորիչներ՝ Հովսեփ Էմին, Մովսես Բաղրամյան և Շահամբր Շահամբրյան։

18-րդ դարի երկրորդ կեսի հայ լուսավորական իդեոլոգիան ուներ քաղաքական, ռեոլուցիոն պայքարի շեշտված բովանդակություն։ Առաջնահերթ հարցն այդ շրջանում հայ ժողովրդի ազատագրության խնդիրն էր, որը պետք է լուծվեր սուլթանական և շահական բռնապետությունների լուծը ապստամբությամբ թոթափելու միջոցով։ Այս կարևոր հանգամանքն իր խոր կնիքը դրեց հայ լուսավորական գաղափարախոսության վրա։ 18-րդ դարի երկրորդ կեսի հայ լուսավորիչները միաժամանակ և քաղաքական գործիչներ, ազգային ազատագրական շարժման խոշոր ներկայացուցիչներ էին։ Հովսեփ Էմինը, օրինակ, ոչ միայն նոր, լուսավորական գաղափարների սոսկ քարոզող էր, այլև հայ ազատագրական շարժման պրակտիկ գործիչ։

Հովսեփ Էմինը՝ հայ հասարակական մտքի և ազատագրական շարժման այդ կարկառուն դեմքը՝ դժբախտաբար մինչև օրս չի դարձել գիտական ուսումնասիրության առարկա։ Նա մոռացության է մատնվել ոչ միայն մինչև-մարքսիստական, այլև մարքսիստական պատմագրության կողմից։ Էմինի

մասին դրականության մեջ կարելի է գտնել միայն աննշան և պատահական հիշատակություններ: Այսպես, օրինակ՝ էմինի մասին հիշվում է Փարիզում լույս տեսած «Մասյաց աղաջի» հանդեսում: Գարրիել վարդապետ Այվազովսկու խմբագրությամբ հրատարակվող այդ պարբերականի 1856 թ. համարում (էջ 269—271) զետեղված է Սանփաննոս Պալասանյանի «Հովսեփ էմին և էդմոնդ Պլըք» խորագիրը կրող հոդվածը, որտեղ անգլիական ազդյուններից թարգմանաբար բերվում են մի քանի տեղեկություններ էմինի և նրա անդլիացի բարեկամ Բլըքի փոխհարաբերությունների մասին: Այնուհետև մի փոքրիկ հիշատակություն էմինի մասին կա Բուսկովի «Материалы для новой истории Кавказа» աշխատության երկրորդ հատորում (էջ 141), որտեղ շատ թեթևակի հիշվում է տյն մասին, թե հայազգի էմինը 1760 թ. Անդլիայից եկել է Պետերբուրգ և այնտեղից էլ անցել է Կովկասի հայրենակիցների ազատագրությունը կազմակերպելու, բայց անհաջողություն գտնելով, անցել է Հնդկաստան և այնտեղ էլ մահացել է: Էմինի մասին հիշատակություն է անում նաև «Փորձ»-ը: Այդ հանդեսի 1877 թ. երկրորդ համարում զետեղված է Ա. Երիցյանի «Հայերի մասնակցությունը Ռուսաստանի՝ Անդրկովկասում արած տիրապետությունների մեջ» հոդվածը, որտեղ էմինի մասին կրկնվում է այն, ինչ որ կա Բուսկովի աշխատության մեջ: Էմինի մասին, համեմատաբար ավելի մանրամասն խոսում է Լեոն (տես «Մուրճ», 1903 թ. № 11—«Հայոց զրականությունը 18-րդ դարում» հոդվածը և «Հայոց պատմություն», նորագույն շրջան, մասն Ա, ապակետիպ, 1926 թ.): Էմինի մասին հիշատակություն ունի նաև Մ. Իսախանյանը («Աղվանից պատմություն», հատ. Բ, 1907 թ.) և այլն:


Հովսեփ էմինի կյանքն ու գործունեությունն ուսումնասիրելու համար հիմնական աղբյուրն առայժմ հանդիսանում է նրա «Հովսեփ էմինի կյանքն ու արկածները» (Life and Adventures of Ioseph Emin) ինքնակենսագրական աշխատությունը: Էմինի այդ ինքնակենսագրության առաջին հրատարակությունը կատարվել է նրա կենդանության ժամանակ, 1792 թվին Լոնդոնում, անգլերեն լեզվով: Առաջին հրատարակությունն ունեցել է ընդամենը 200 օրինակ: Երկրորդ հրատարակությունը կատարվել է 1818 թ. Կալկաթայում, դարձյալ անգլերեն լեզվով: Երկրորդ հրատարակությունը, որ լույս է տեսել էմի Արդարի խմբագրությամբ, ունի ծանոթություններ, լրացումներ և հավելված, որտեղ տրվում են էմինի կյանքը լուսաբանող մի շարք նամակներ: Էմինի այս չափազանց արժեքավոր աշխատության հայերեն թարգմանությունը մինչև վերջին ժամանակներս չի կատարվել: Վերջերս միայն՝ 1940 թվի ընթացքում, Արմֆանի Պատմության և նյութական կուլտուրայի Ինստիտուտի ջանքերով, այդ գործը թարգմանվել է հայերեն (թարգմանվում է նաև ռուսերեն) և արդեն պատրաստ է հրատարակության:

Էմինի կյանքի և գործունեության վերաբերյալ կարևոր տեղեկություններ կան նրա անգլիացի բարեկամների նամակագրություններում և նրան ծանոթ անգլիացի հասարակական-քաղաքական գործիչների մասին հրատարակված կենսագրականներում (տես, օրինակ՝ E. Y. Climensson — «Letters of Elizabeth Montagu», Prior — «Life of Edmund Burke», Teignmouthe —

„Life of sir William Yones“ ե այլն): Էմինի մասին արժեքավոր տեղեկություններ են տալիս նաև ցարական կառավարության արտաքին գործերի կոլեգիայի արխիվային նյութերը և Էջմիածնի կաթողիկոս Սիմեոն Նրևանցու ձեռագիրը, գեոևս չհրատարակված նամակները: Էմինի հիշատակը հիշեցնող միակ նյութական մնացորդը դա Կալկաթայի հայոց եկեղեցու գավթում տեղավորված նրա գերեզմանն է: Շատ բնորոշ է, որ գերեզմանաքարի վրա նրա անվան մակագրության հետ միասին նկարված են թմրուկ և թնդանոթ:

2

Հովսեփ Էմինը ծնվել է 1726 թվին, Խրանի (Պարսկաստանի) Համադան քաղաքում: Նրա նախնիները 17-րդ դարի սկզբին, Արարատյան դաշտի հայ բնակչությունը Շահ-Աբասի կողմից բռնի կերպով տեղահանվելու ժամանակ, գաղթեցին Հայաստանից և բնակություն հաստատեցին Համադանում: Էմինի հայրը, որ վաճառական էր Պարսկաստանում, անհաջողությունների հանդիպելով, գնում է Հնդկաստան՝ Կալկաթա քաղաքը ե այնտեղ շարունակում իր դրաղմունքը՝ վաճառականությունը: Պատանի Հովսեփը նույնպես գնում է Կալկաթա ե մասնակցում հոր տնտրական գործարարներին: Կալկաթայում Էմինը շփվում է անգլիական շրջանների հետ, սովորում է անգլերեն և սկսում է կարգալ երոպական գրականություն: Երիտասարդ Էմինի մեջ շուտով ծագում են գիտություն ձեռք բերելու և հայրենիքին ծառայելու դադափարները: Էմինի մեջ հատկապես խիստ ցանկություն է առաջանում գնալ Անգլիա, սովորել ղինվորական արվեստը, որպեսզի կարողանա ծառայել իր հայրենիքի ադատադրության գործին: 1751



ՀՈՎՍԵՓ ԷՄԻՆ (1726—1809)

թվի փետրվար ամսին, հակառակ հոր կամքին, նա անգլիական մի նավով Կալկաթայից ճանապարհ է ընկնում և, վեց ամիս տևող նավագնացություններից հետո, հասնում է Անգլիա: Լոնդոնում էմինը հանդիպում է մեծ ղժվաթյունների և զրկանքների: Իր գոյությունը պահպանելու համար նա Լոնդոնում կատարում է զանազան սև աշխատանքներ—վարում է դռնապանի պաշտոն, ծառայում մանրավաճառի մոտ և այլն: Իր անվերջ թափառումների ժամանակ Լոնդոնում էմինը պատահաբար ծանոթանում է հայտնի անգլիական քաղաքական-դրական գործիչ Էդմոնդ Իլլքի հետ, որը և դառնում է նրա մտերիմ ու ազնիվ բարեկամներից մեկը: Բազմաթիվ ղժվաթյուններ կրելուց հետո, էմինը անգլիացի իր ծանոթների, մասնավորապես լորդ Նորթմբերլանդի միջոցով ընդունվում է Լոնդոնի Վուլցիչի զինվորական ակադեմիան: Իր կյանքի այս առաջին շրջանի մասին էմինը անգլիացի իր ծանոթներից մեկին ուղղած մի նամակում գրում է.

«Ես ծնվել եմ Համադանում, որն այն վայրերից մեկն է, ուր իմ ղժբախտ ազգը գերություն մեջ է ապրում Շահ-Աբասից ի վեր: Իմ հայրը, ինչպես և մյուս հայերը, ինձ սովորեցրել է միայն մայրենի լեզվով կարգալգրել, անգիր անել Սադմոսն ու երգել եկեղեցում: Բայց նա ինձ չսովորեցրեց ղենք գործածել և ոչ էլ ինձ հրահրեց մեծ գործերի էությունը հասկանալու համար... Ես ճանապարհվեցի Գիլան, այնտեղից Խսպահան, Խսպահանից Բասրա և այնտեղից Կալկաթա, որտեղ իմ հայրը վաճառական էր և մտածում էր ինձ ես վաճառական դարձնել: Սակայն ես պարզ տեսնում էի, թե ինչպես մեր ժողովուրդն արյուն-քրտինք էր թափում մի կտոր հացի համար և թե ինչպես, երբ նա մի քիչ դրամ էր հավաքում, անմիջապես կողոպտվում էր ստահող պատճառաբանություններով, երբեմն փաշաների, երբեմն խաների և երբեմն էլ հնդիկ իշխանների կողմից, որովհետև ձեռքին զենք չունեի: Միաժամանակ ես տեսնում էի, թե ինչպես երոպացի ժողովուրդները խելացի, ուժեղ են ու կռվում են կազմակերպված՝ մեկ մարդու պես: Մտածեցի, որ եթե ես կարողանամ երոպացի զինվորականների նման լինել, կգնամ իմ հայրենակիցների՝ լեռնային Հայաստանի (այսինքն՝ Ղարաբաղի—Մ. Ն.) հայերի մոտ: Ես լսել էի, թե նրանք երբեք չեն պարտվել, թե նրանք խիզախ ու քաջ մարդիկ են... Մտածում էի, որ եթե ես կարողանամ նրանց սովորեցնել զինվորական արվեստը, դա շատ օգտակար կլինի... Իմ այդ խորհրդածությունները հայտնեցի հորս, բայց նա երես դարձրեց ինձնից և նախատեց ինձ: Ես չէի կարող տանել այդպիսի կյանքը: Ես փախա և իմ ճանապարհածախսի փոխարեն զանազան ծանր աշխատանքներ կատարեցի ամբողջ ճանապարհորդությունյան ընթացքում՝ Բենգալիայից մինչև Լոնդոն: Լոնդոնում մինչև փողերիս վերջանալը պ. Միդլենի շեմարանում ես սովորում էի անգլերեն լեզու և զրականություն: Բայց ես ստիպված եղա թողնել ուսումս և աշխատել մի կտոր հացի համար: Օտար երկրում, առանց բարեկամների ու դրամի, ես շատ զրկանքներ կրեցի ու տառապեցի: Սիրտում բեռնակիր եղա... Ուղիղ երկու տարի ես այդտեղ ծանր բեռներ էի կրում: Իմ աշխատավարձից հատկացրի մի քիչ երկրագործություն սովորելու և գրելու մեջ կատարելագործվելու համար: Սկսեցի նաև ֆրանսե-

ընն սովորել, բայց աշխատանքս խանգարվում էր: Ես սկսեցի տատանվել, որովհետև ես ջանք էի թափում, բայց առանց հույսի: Ես կորցրի իմ առողջությունը և վերջապես հարկադրվեցի թողնել այդ աշխատանքը: Մի ծանոթ ինձ հանձնարարեց Ուերստր անունով մի փաստարանի: Նրա մոտ ես ուսում-խմում էի, բայց հանգստություն չունեի, որովհետև ոչ ոք չէր նախում իմ վրա և ոչ ոք չէր սփռում իմ ծրագրերն իրականացնելու գործում... Վերջապես ես ունեցա ծանոթներ, որոնք խորհուրդ տվին ինձ դիմել գնդապետ Գենդլոյին: Այս վեհանձն պարոնը շատ ազնիվ վերաբերմունք ցույց տվեց իմ հանդեպ: Սակայն նա ինձ ճանաչելուց կարճ ժամանակից հետո վախճանվեց: Ես նորից ընկա իմ նախկին անձկություն մեջ... Մտածում էի վերադառնալ դեպի թշվառ կուրություն և Հնդկաստանում կրկին մատնվելու ստրկության, երբ նախախնամությունը ուղարկեց ինձ իմ ախրը՝ լորդ Նորթմրենլանդին, որը դեռնից վեր ընթացրեց ինձ»¹:

Ակադեմիա մտնելուց հետո Էմինը մեծ եռանդով ու սիրով սկսում է ուսումնասիրել ռադմական գործը, որովհետև նա իր քաղաքական ծրագրերի իրականացումը կապում էր այդ գործի հետ: Թե հնչ նպատակներով էր Էմինը գնացել Լոնդոն և ինչպիսի մեծ գնահատական էր տալիս նա ռադմական արվեստին, այդ երևում է հորը դրած նրա նամակի հետևյալ տողերից.

«Հարգելի հայրիկ: Առաքինություն որդին քաջությունն է, և քաջությունը չի կարող դոյություն ունենալ առանց առաքինության... Ի՞նչ ես մտածում, կարծում ես՝ թե ես եկել եմ այստեղ միայն անգլերեն լեզուն սովորելու... Ո՛չ, ոչ, ես եկել եմ ռադմական արվեստը սովորելու, որը նախընտրելի է աշխարհիս բոլոր արվեստներից... Այս արվեստով է, որ մենք պետք է կռվենք քրիստոնյա ազգերի ջարդարարների, ու թշնամիների դեմ... Մենք միշտ կոտորվելու ենք մեր թշնամիների կողմից, եթե մենք ճիշդ ու ջանք չթափենք սովորելու այդ արվեստը: Հայրիկ, ահա սրանք էին քո միակ որդու հեռանալու պատճառները. ոչ թե ցուփություն և շվախություն համար, այլ արժանիք և իմաստություն ձեռք բերելու, աշխարհը ճանաչելու և ծառայություն մատուցելու իմ անպաշտպան հայ ազգին»²:

Էմինը, սակայն, ակադեմիան չվերջացրեց: 1756 թվին սկսվեց մոթենամյա պատերազմը: Էմինը որպես կամավոր մտնում է սկզբում անգլիական, ապա գերմանական բանակը և մասնակցում պատերազմական գործողություններին ընդդեմ Ֆրանսիայի: Պատերազմը վերջանալուց հետո նա Լոնդոն վերադարձավ և սկսեց կոնկրետ պլաններ կազմել ու պրակտիկ քայլեր անել Հայաստանի ազատագրության մասին կազմած իր ծրագրերն իրագործելու համար: Լոնդոնում եղած ժամանակ նա արդեն ուներ մշակված քա-

¹ Տես «Life and Adventures of Joseph Emin». Second Edition. Calcutta. 1918, էջ 67—69:

Էմինի ինքնակենսագրական այս աշխատությունից քաղվածքներ բերում ենք ընկեր Մ. Մինասյանի թարգմանությամբ:

² Նույն աեղում, էջ 102—103:

դաքական մի ծրագիր, որի համաձայն պետք է համահայկական մի ընդհանուր ապստամբության միջոցով, զենքի ու ժող ազատագրել ինչպես Պարսկահայաստանը, այնպես էլ թյուրքահայաստանը օտարների լծից: Հայ ժողովրդի ազատագրության գործը նա կապում էր Վրաստանից օգնություն ստանալու ակնկալության հետ: Էմինն առանձնապես մեծ տեղ էր տալիս վրաց թագավոր Հերակլ Երկրորդին և իր հույսերը մեծ չափով կապում էր նրա հետ: Դեռ Լոնդոնից նա Հերակլին մի նամակ է ուղարկում, որով մի շարք խորհուրդներ է տալիս նրան և խնդրում՝ իրեն, որպես սալայի, ծառայության մեջ վերցնի վրացական բանակում: Հերակլին ուղղած իր այդ նամակում Էմինը, ի միջի այլոց, գրում էր.

«Ես կցանկանայի ծառայել ձեզ, որպես երոպական սպա, և ըստ իմ համեստ կարողությունների՝ սովորեցնել ձեր զինվորներին կռվել երոպացիների նման... Ես կցանկանայի ձերդ մեծությանը տեղեկացնել, թե ինչպիսի միջոցներով է, որ երոպական ազդերն այնքան հաղթանակող և այնքան քաջ ռազմիկներ են լինում... Իմ նպատակն է՝ ձերդ մեծության մոտ ծառայության մտնել, միաժամանակ ինձ հետ բերել ամեն կարգի հմտությամբ օժտված մարդիկ ու ժեղացիներ և վերակազմելու ձեր պետությունը երոպական պետությունների նման»¹:

Մի շարք նախապատրաստական ձեռնարկումներից հետո, 1760 թ. Էմինը հոլլանդական մի նավով ճանապարհ է ընկնում դեպի Հայաստան: Նույն թվի վերջերին նա հասնում է Ալեքսանդրիա նավահանգիստը, որտեղից անցնում է Հալեբ և ապա՝ Հայաստան: Էմինն այցելում է շատ հայ գյուղեր, ուսումնասիրում է այդ գյուղերը, տեղեկություններ է տալիս երոպական կարգերի և լուսավորության մասին, հորդորում է՝ չլսել հնազանդություն քարոզող հայ հոգևորականներին, զենք վերցնել՝ ապստամբելու և օտար լծից ազատվելու համար: Հայ գյուղերից մեկում տեղի է ունենում հետևյալ էպիզոդը. Էմինը գյուղացիներին հարց է տալիս, թե ինչու նրանք ազատ չեն, ինչու չեն ապստամբում, ազատության չեն ձգտում: Գյուղացիները պատասխանում են, թե՝ եկեղեցու «սուրբ հայրերը» իրենց սովորեցնում են հնազանդ լինել, չապստամբել, որովհետև հայերի ազատությունը իբր թե մյուս աշխարհում է լինելու: Այո բացատրությունը լսելուց հետո Էմինը, զիմեղով կրոնի, ավետարանի օգնությանը, սկսում է հակառակն ապացուցել: Նա գյուղացիներին դիմում է հետևյալ խոսքերով.

«Դուք պետք է որ լսած լինեք Ֆրանդստանի (Եվրոպայի) քրիստոնյաների մասին. եթե նրանք ավետարանը հասկացած լինեին այնպես, ինչպես մեր սուրբ հայրերն են բացատրել ձեզ, ապա նրանք էլ մեզ նման, մահմեդականներին ստրուկ կդառնային: Խաչակրությունը, ընդհակառակը, նշանակում է կռվել ու մեռնել. ով այդպես լինի, նա կժառանգե աստծու թագավորությունը և ոչ թե նրանք, ովքեր վարում են թույլ ու վախկոտ կյանք: Դավթի Սաղմոսը վկայում է՝ «մի լինիք ձիու նման կամ ջորու նման, որի բերանը պետք է սանձ դրվի»: Օրինակի համար, բանականու-

¹ „Life and Adventures of Ioseph Emin“. Second Edition. Calcutta, 1918, էջ 109—113

Թյուն ունեցող մարդը պետք է թույլ չտա, որ ինքն ուրիշների ստրուկը դառնա: Նա նույնիսկ զգուշ պետք է լինի, որ իր կրոնակիցները չիշխեն իր վրա, որովհետեւ աստված բոլորին էլ հավասարապես աղատ է ստեղծել: Ամեն մարդ հարգելի է, հակառակ դեպքում նա կենդանուց չի տարբերվի: «Մարդը, որն իր պատիվը չի հասկանում, նման է կորսալյան մատնված կենդանու»¹:

Շարունակելով իր ճանապարհորդությունը, Էմինը 1761 թվին հասնում է Էջմիածին, որտեղ այդ ժամանակ կաթողիկոս էր Հակոբ Շամախեցին: Էջմիածնի վանքի միաբանության կողմից նա թշնամական վերաբերմունքի է արժանանում: Համոզվելով, որ այդ տեսակ պայմաններում չի կարող իր ծրագրերը իրագործել, Էմինը իր եկած ճանապարհով վերադառնում է Անգլիա, որպեսզի նորից, այս անգամ արդեն հանձնարարականներով ու ավելի նախապատրաստված վերադառնա Հայաստան: Այս անգամ Լոնդոնում նա ֆուում է ութ ամիս ե այդ ժամանակամիջոցում ծանոթանում է ռուսական ղեսպան իշխան Գոլիցինի հետ, նրանից ստանում է համապատասխան հանձնարարականներ և 1761 թվականի հոկտեմբեր ամսին ճանապարհվում է Ռիգայի վրայով դեպի Պետերբուրգ: Պետերբուրգում շնորհիվ հանձնարարական նամակների, նա տեսակցություն է ունենում բարձրաստիճան անձանց հետ, այդ թվում նաև կոմս Վորոնցովի ու այդ ժամանակ Պետերբուրգում գտնվող վրաց թագավոր Թեյմուրազի հետ: Էմինի ծրագրերը հավանություն է գտնում. Նիդալեհտա կայսրուհու մահվանից հետո ռուսական զահը բարձրացած Պետրոս Երրորդ կայսրը հանձնարարական նամակ է գրում և տալիս Էմինին՝ վրաց թագավոր Հերակլին ներկայացնելու համար: Ահա այդ նամակը.

«Իշխան Հերակլին: Տեր, նամակաբերս, Հովսեփ Էմին, մի հայ քրիստոնյա, ծնված է Պարսկաստանի Համադան քաղաքում, դաստիարակված է Անգլիայում և դիմվորական արվեստի մեջ կաաադեղադործված է Գերմանիայում. իր վարքով արժանի է դարձել այդ հայտնի (անգլիական—Մ. Ն.) աղգության համակրանքին. լսելով ձեր հայտնի անունը, որոշել է դալ ձեզ մոտ ե իր ծառայությունն առաջարկել ձեզ: Լոնդոնի իր աղնվական բարեկամները և մեր կայսերական ղեսպան իշխան Գոլիցինը հանձնարարական նամակներով նրան ուղարկել են մեզ մոտ: Այստեղ գալուց հետո մենք հարմար համարեցինք նրան ներկայացնել ձեր հանգուցյալ հորը՝ Թեյմուրազ թագավորին, որը, տեսնելով նրան, շատ հետաքրքրվեց նրանով և խոստացավ նրան իր հետ տանել Վրաստան: Իր մահից մի քանի օր առաջ նա ասաց, որ Էմինը ճանապարհվի Վրաստան՝ առանց ուշանալու: Նա այդպես էլ անում է: Իսկ եթե դուք չկամենաք նրան պահել ձեզ մոտ ե կամ թե անհամաձայնություն ծագի ձեր և նրա մեջ, մենք խնդրում ենք, որ ամենավայելուչ կերպով նրան հետ ուղարկեք, մենք պատրաստ ենք մեծ հաճույքով նրան մեր կայսերական ծառայության մեջ պահելու, քանի որ մեզ լավ հայտնի են նրա բնավորությունն ու լավ բարքը»:

¹ Նույն տեղում, էջ 142:

² Նույն տեղում, էջ 180:

Հանձնարարական այս նամակով էմինը 1762 թ. մաքա ամսին Պետերբուրգից, Մոսկվայի վրայով, ճանապարհովում է դեպի Աստրախան: Աստրախանում էմինը մնում է մի քանի ամիս, որից հետո, Անդրկովկաս անցնելու նպատակով, դնում է Ղզլար: Այստեղ էմինը հանդիպում է անհաջողությունների: Սահմանապահ զորքերի գեներալ-հրամանատարը կասկածում է էմինի անձնավորության վրա և թույլ չի տալիս նրան Անդրկովկաս անցնել: Գեներալը էմինին հետ է ուղարկում հատուկ հսկողությամբ: 35 օրվա ճանապարհորդությունից հետո՝ էմինը հասնում է Մոսկվա: Այստեղ, Հովհաննես Լազարյանի միջոցով, նա տեսակցում է կոմս Վորոնցովին և իշխան Գոլիցինի հետ լինում է արտաքին գործերի գաղտնի կոլեգիայում: Էմինը նորից շարադրում է իր ամբողջ ծրագիրը և մտադրությունը: Էմինի ծրագիրը հայտնում են Եկատերինա Երկրորդ կայսրուհուն, որը հաճությամբ ընդունում է այն: Անցագիր ձեռք բերելով և դրամական օժանդակություն ստանալով իր ծանոթներից, էմինը 1763 թ. մարտ ամսին նորից ճանապարհովում է Անդրկովկաս: 15 օր ճանապարհորդելուց հետո նա հասնում է Աստրախան և ապա, Ղզլարի վրայով, Թբիլիսի:

Էմինը Թբիլիսիում լավ ընդունելություն է գտնում: Հերակլ թագավորը էմինին հրավիրում է իր մոտ և մանրամասն խոսում նրա հետ:

Մի շարք գաղտնի տեսակցությունների ժամանակ էմինը Հերակլին բացատրում է իր ծրագիրը, առաջարկում է անհապաղ զորք կազմակերպել, արշավել Արևմտյան Հայաստանի (Թյուրքահայաստանի) վրա, տապալել տաճկական ու պարսկական լուծը և հայ ու վրաց ժողովուրդներին ազատագրել այդ լծից: Էմինն անհրաժեշտ է գտնում ստեղծել հայ-վրացական ամուր դաշինք, որովհետև, նրա կարծիքով, միայն այդ դեպքում հնարավոր է Վրաստանը և Հայաստանն աղատագրել օտար բռնապետություններից: Էմինն ամեն կերպ փորձում էր համոզել Հերակլին, որպեսզի նա կազմակերպի այդ գործը և ապա թագավորի ազատ և միացյալ վրաց-հայկական պետությանը: Միաժամանակ էմինը Հերակլին խորհուրդ էր տալիս սաստել ազնվականությունը, մտածել ժողովրդի կարիքները բավարարելու մասին, դպրոցներ բաց անել, դիտություն-լուսավորություն տարածել, զինվորական արվեստը զարգացնել, օրինակ վերցնել ևրդական (անգլիական) կարգերից և այլն: Հերակլը, ինչպես պատմում է էմինը՝ համաձայնում է այդ բոլոր առաջադեմների հետ, սակայն միշտ կրկնում էր, թե՛ այդ բոլորի համար փող է հարկավոր, իսկ ինքը փող չունի:

Էմինը մի քանի ամիս մնաց Թբիլիսիում, ապա ամառը, Հերակլի հետ միասին, անցկացրեց Կախեթիայում: Վրաստանում եղած ժամանակ էմինը նամակագրություն ուներ Մշո ս. Կարապետ վանքի վանահոր, Ղարաբաղի մելիքների և այլոց հետ: Էմինն իր նամակներով հորդորում էր նրանց աշխատել հայ ժողովրդի ազատագրության համար: Հետաքրքրական է մասնավորապես այն, որ էմինին Մուշից գրած նամակներում հավատացնում էին, թե Արևմտյան Հայաստանում կան բոլոր նախապայմանները հաղթական ապստամբության համար, թե արդեն ապստամբների մի խոշոր բանակ է կազմակերպվում և այլն: Ահա այդ նամակներից մեկը, որ վանահայր Հովհաննեսը 1763 թվին գրել է էմինին.

«Գրարերս՝ Մելիք Ստեփանը, որն այս տեղացի է, Հայաստանի Քյուրդիստան գավառից, բերում է Ձեզ այս նամակը: Նրանից կստանաք 600 հնչուն ոսկի, Ձեր ճանապարհի չնչին ծախսերին հատկացնելու համար, և հնարավորության սահմաններում շտապեցրեք Ձեր դալը: Խնդրեցեք իշխանին, աստուծո օրհնությամբ և իմ աղոթքով, որ Ձեզ տա քսան վրացի հեծյալ զինվոր, ի բավարարություն տեղվույս ժողովրդին և ի հավատացումն նրանց, որ Դուք նրա բարեկամն եք: Եթե միության (խոսքը հայ-վրացական միության մասին է -- Մ. Ն.) թշնամիները արգելք հանդիսանան նրան հավանություն տալու Ձեր պահանջին, ոչինչ, աստված արդարությունը կգործադրի Ձեր հանգեպ: Բայց չհրաժարվեք ընդունելու վերոհիշյալ դումարը, վերցրեք ան և ծախսեցեք քսան Ձեր ցանկության: Իսկ երբ տեսնեք, որ իշխանն իր աջակցությունը չէ շնորհում, Ձեզ, մի անհանգստանաք և մի մտածեք: Ես ստացա Ձեր նամակը. Դուք գրել էիք այն դայլերի նենգամիտ գործունեության մասին, որոնք առերևույթս, մեր փրկչի աշակերտներն են ձեռնում, սակայն միշտ պատճառ են եղել մեր անմեղ ազգի անկման և որոնք ոչ այլ ինչ են, եթե ոչ՝ անհավատների ձեռքին գործիք: Անցյալ տասնամեկ ամսվա ընթացքում ես զբաղված եմ եղել նամակագրությամբ, և շատ հեշտությամբ կարողացա ի նպաստ Ձեզ արամադրել քյուրդիայի բոլոր մեծամեծ հայերին, որ մտածեն նույն հերոսական ուղիի մասին... Ինչ վերաբերում է կռվող ուժին, վեց օր ճանապարհորդելուց հետո, Դուք կգտնեք Ձեզ դիմավորող 40.000 հոգու: Ասորիներն ու եզիդի քյուրդերը նույնպես միանալու են մեզ: Վրաստանի իշխանին չասեք՝ թե նրանք պետք է դրամ ստանան, որովհետև, որպեսզի ավելի հանգստացնեմ Ձեր միտքը -- պետք է ասեմ, որ նրանք բոլորը երգվել են... որ իրենք Ձեր հրամանի տակ տասր տարի կռվելու են առանց որևէ դրամական ակնկալության, իսկ ինչ վերաբերում է սննդամթերքին և ռազմամթերքին, նրանք սեփական միջոցներով ապահովված են նաև այդ տեսակետից: Թյուրքերը նույնը չեն, ինչ որ էին հարյուր տարի առաջ: Առանց կռվելու, նրանք տեղի են տալու, և քանի որ նրանց քաղաքները ամրացված չեն, կարող եք գուշակել, թե ինչքան հեշտ է լինելու դրանց գրավումը: Մի նախապաշարյալ մարդարեություն արմատացել է նրանց ուղեղում, թե իրենց գերիշխանության վախճանը մոտեցել է և թե անօգուտ կլինի քրիստոնյաների դեմ կռվելը: Նրանք լսել են նույնպես, թե Դուք եկել եք ռուսական կայսրությունից, որի երանյալ կայսրուհու կողմից շատ ուժեղ կերպով հանձնարարվել էք Վրաստանի իշխանին, այնպես որ թյուրքերը երբեք չեն համարձակվի քրիստոնեի արյուն թոփելու: Երեք տարի է անցել այն օրից, երբ Դուք, Միջերկրականի վրայով, եկաք Անգլիայից և Ձեր անցած գյուղերում հորդորեցիք ժողովրդին: Դրանից հետո ամեն մի հայ գիմել է գնեքի, նույնիսկ կանայք տատրաստ են կռվելու, պայմանով, որ Հերակլը համաձայնի պաշտպանել Ձեզ: Բավական է, ինչքան զրեցի: Իսկ երբ Դուք հաջողություն չգտնեք Հերակլի մոտ, իմ հայրական խորհուրդն այն է, որ երբեք չհուսահատվեք, այլ շարունակեցեք Ձեր ամբողջ կորովով և ոչ մի վտանգից մի վախենաք, աղավիհեցեք աստծուն. հաջողեք թե ոչ, Դուք համբավ կունենաք: Բայց ես մեծ հույս ունեմ, որ Դուք պետք է լինեք Ձեր խեղճ ու ճնշված ազգակիցներին ստրկության

Սիմեոն կաթողիկոսի այս նամակից պարզորոշ երևում է, որ Էմինը, թրխիսիում եղած ժամանակ, լայն պրոպագանդա է մղել հօգուտ ապստամբության, հատուկ մարդիկ է ունեցել այդ նպատակի համար և սերտ կապ է հաստատել ս. Կարապետի վանահոր հետ: Նամակից երևում է նաև, որ Հիրակլը սկզբում համաձայնել է Էմինի ծրագրի հետ և նույնիսկ հովանավորել է նրան: Սակայն հետագայում, Սիմեոն Երևանցու և ընդհանրապես հայ կղերականության հորդորներով, Հերակլը փոխում է իր վերաբերմունքը և Էմինին նորից արտաքսում է Վրաստանից:

Հուսախաբված և հուսալքված՝ Էմինը 1763 թվի վերջերին թողնում է Վրաստանը և անցնում Դաղստան: Սյնտեղ նա լավ ընդունելություն է գտնում լեռնաբնակ բնակչության (լեզգիների) մեջ և նույնիսկ ընտրվում է ղորախմբի ղեկավար: Մոտ երկու տարի Էմինը մնում է Դաղստանում և օգտագործելով իր ղիրքը, կասեցնում է լեզգիների արշավանքները դեպի Վրաստան:

1766 թվին Էմինը լեզգիների հետ միասին գալով Գյանջա, իր ակտիվ միջամտություններով հայ գյուղերը փրկում է լեզգիների ասպատակություններից ու հայ գերիներին ազատում քրդերից: 1766—1767 թվականներին Էմինը շրջում է Ղարաբաղում, լինում է հայ մելիքների մոտ և աշխատում է միություն առաջ բերել նրանց մեջ, փորձում է կազմակերպել մի հզոր բանակ և ընդհանրապես քարոզում է ազատագրական շարժման գաղափարը: Էմինը մեծ հույսեր էր կապում Ղարաբաղի (Սամսաթի) մելիքությունների հետ և կարծում էր, թե նրանք պետք է լինեն հայ ազատագրական շարժման կենտրոնական ուժը: Սակայն Էմինը շուտով հիասթափվում է նաև նրանցից: Հայ մելիքները ոչ միայն չեն ընդունում Էմինի ծրագրերը, այլև, դարձյալ Սիմեոն Երևանցի կաթողիկոսի պահանջով, իրենցից հեռացնում են հայ ազատագրական շարժման այդ փայլուն գործչին: Այդպես է վարվում Էմինի հետ նաև Գանձասարի Հովհաննես կաթողիկոսը, որը, ի միջի այլոց, պատմում է Էմինին, թե այդ բոլորի պատճառը Սիմեոն Երևանցին է:

«Զգուշացիր նրա (Սիմեոն Երևանցու—Մ. Ն.) չարանենգ սրտից.— դիմում է Գանձասարի կաթողիկոսը Էմինին: Մի դատապարտիր մեր գլխավորներին և ոչ էլ հայ ժողովրդին, որոնք իրենց բոլոր միջոցներով կռիանային քեզ և կենթարկվեին քո ղեկավարությանը, եթե միայն նա (Սիմեոնը—Մ. Ն.) չլիներ: Հիշում ես մի տասնհինգ օր առաջ իմ սուրհանդակը բերեց մի նամակ՝ ուղղված Մելիք Յուսուֆին, երբ դու նրա մոտ էիր Գյուլիստանում... Դա Սիմեոնի սևփական նամակն էր, որ ուղարկված էր ինձ իր սուրհանդակի միջոցով... Նա (Սիմեոնը—Մ. Ն.) ցանկություն էր հայտնում, որ ես իմ սուրհանդակի միջոցով այն ուղարկեմ Յուսուֆին և հրահանգեմ նրան, որ քեզ վտարե: Նա միաժամանակ ուղարկել է ուրիշ չորս նամակ՝ ուղղված չորս մելիքներին, խորհուրդ տալով նրանց զգուշ լինել և չկապվել քո ձեռնարկումների հետ... Հակառակ պարագայում նորին սրբությունը սպառնում էր բանտարկել նրանց... Ունենալով այդպիսի մի հզոր

ծագել այդ կապակցությամբ: Սիմեոն Երևանցու նամակը, հենց այդ պատճառով էլ, պատմական կարևոր նշանակություն և մեծ արժեք է ստանում:

թշնամի... ինչպես հնար է, որ դու հաջողութուն գտնես... մենք ոչ մի խոչընդոտ չունենք, բացի եկեղեցականներից, որոնք այժմ իրենց գլխին ունենալով Սիմեոնին, արգելք են հանդիսանում քեզ և պիտի խանդարեն քո բոլոր գովելի ծրագրերը: Դուք պետք է համբերեք, որքան ժամանակ նա ապրում է: Երբ նա հրաժեշտ տա այս անցավոր աշխարհին... այն ժամանակ մենք կարող ենք հույս ունենալ մեր ազատության համար»¹:

Այս բոլոր անհաջողութուններից հետո՝ էմինը որոշում է վերադառնալ Ռուսաստան, բայց ճանապարհին, Դամախի քաղաքում, նա տեղեկություններ է ստանում այն մասին, որ Պոյի շրջանի ասորի քրիստոնյաները պատրաստ են իրեն (էմինին) ընդունելու և ապստամբելու պարսկական արապետության դեմ: Համատարով այդ լուրերին և հույս ունենալով, որ ասորիների ազատագրությունը կարող է ազդանշան դառնալ հայ ազատագրական շարժման համար, էմինը ճանապարհվում է դեպի Պոյ: Բավական գրավարություններից հետո էմինը հասնում է ասորական Պոսրով գյուղը և տեսակցում է ասորի Հովհաննես վարդապետի հետ: Վերջինս սկզբում ողբվորությամբ ընդունում է էմինին, խոսք է տալիս ոտքի հանել բոլոր ասորիներին և այլն, բայց հետո, երբ իմանում է, որ էմինը ոչ փող ունի և ոչ էլ Հերակլի օգնությունը, հրաժարվում է իր բոլոր խոստումներից, հայտարարելով, որ առանց փողի և Հերակլի՝ ոչինչ չի կարելի անել: Էմինը, հուսահատված, թողնում է Պոյը և վերադառնում Անդրկովկաս՝ Ռուսաստան ճանապարհվելու նպատակով: Սակայն նոր դեպքերի և լուրերի ազդեցության տակ, էմինը նորից դնում է Թրիլիսի, հույս ունենալով, որ այս անգամ կկարողանա համոզել վրաց թագավոր Հերակլին՝ իրագործելու իր ծրագրերը: Հերակլն սկզբում դարձյալ լավ ընդունելություն է ցույց տալիս էմինին, նույնիսկ ներողություն է խնդրում պատահածի համար և բացատրում է, թե էմինին ամբաստանողները եղել են Սիմեոն Երեանցի կաթողիկոսը, Թրիլիսիի առաջնորդ Ջաքարիա եպիսկոպոսը և վրացական մի քանի ազնվականներ: Էմինը, այս ընդունելությունից խրախուսված, նորից մի քանի ամիս մնում է Թրիլիսիում, հուսալով, թե այս անգամ արդեն Հերակլը գործի կանցնի հայ և վրաց ժողովուրդների ազատագրության գործը գլուխ բերելու համար: Սակայն այս անգամ ես էմինի հույսերն ի դերե ելան: Հայ կղերի և մասնավորապես էջմիածնի կաթողիկոս Սիմեոն Երեանցու խիստ ճնշման տակ Հերակլը նորից առաջարկում է էմինին հեռանալ Թրիլիսից: Թողնելով Թրիլիսին, էմինն անցնում է Իմերեթիա՝ Սողոմոն թագավորի օգնությամբ դիմելու: Իմերեթիայի թագավորը սիրով է ընդունում նրան և ըստ հարկի հյուրասիրում: Էմինը, սակայն, շուտով նկատում է, որ Իմերեթիայի տերն ամբողջովին տարված է խնջույքներով և անընդունակ է իրագործելու որևէ քաղաքական ծրագիր: Համոզվելով այդ բանում, էմինը, առանց նույնիսկ իր նպատակները բացատրելու, հեռանում է Իմերեթիայից և Գորոն—Թրիլիսիի վրայով անցնում է Գյանջա: Ութ տարվա դեղերումներից հետո տեսնելով իր գործի անհաջողությունը, նա որոշում է ճանապարհվել դեպի Հնդկաստան, գնալ իր ընտանիքի մոտ: 1768 թվին նա Գյանջայից անց-

¹ *Տե՛ս*— „Life and Adventures of Ioseph Emin“, էջ 321—322.

նում է Շուշի և ապա Օրդուբադի ու Թավրիզի վրայով գնում է Բաղդադ, այնտեղից էլ, Բասրայի վրայով՝ Հնդկաստան։ Այդտեղ նա անդլիական բանակում ծառայում է որպես սպա։ 1771 թվին Էմինը տեղեկություն է ստանում, որ պատերազմ է սկսվել Ռուսաստանի և Թյուրքիայի միջև։ Գտնելով, որ հասել է իր ազատագրական ծրագիրն իրագործելու հարմար ժամանակը, նա պատրաստվում է նորից Ռուսաստան գնալ, բայց, Անգլիայի իր ծանոթների խորհրդով՝ հետ է կանգնում այդ մտադրությունից։ Մնալով Հնդկաստանում, Էմինը, սակայն, չի դադարում հայ ժողովրդի ազատագրության ծրագրի իրականացման ուղղությամբ գործելուց։ Նա շարունակում է ազատագրական շարժման դադափարները տարածել հնդկահայերի մեջ։ 1772 թվին Էմինը Կալկաթայից գնում է Մադրաս, որտեղ հյուրընկալվում է Շահամիր Շահամիրյանի մոտ։ Էմինի հորդորներով՝ Մադրասի հայ վաճառականները (Շահամիրյան, Խոջախանյան և ուրիշներ) որոշում են տարեկան 12,000 ռուբլի ուղարկել Հայաստան այնտեղ Էմինի գլխավորությամբ հայկական զինվոր կազմակերպելու համար։ Այդ որոշումը, սակայն, չի կիրառվում շտորհիվ Երուսաղեմի Հովհաննես եպիսկոպոսի, որն այդ ժամանակ գտնվելով Մադրասում՝ խիստ թշնամական դիրք է բռնում և՛ Էմինի, և՛ նրա ծրագրի հանդեպ։ Շատ բնորոշ և հետաքրքրական է, որ Էմինը իր ինքնակենսագրականում մեծ համակրանքով և ողևորությամբ է խոսում Շահամիր Շահամիրյանի մասին։ Պատմելով, թե ինչպես Հովհաննես եպիսկոպոսի ծնշման տակ Մադրասի բոլոր հայերն իրենից (Էմինից) երես դաժճեցին, նա գրում է.

«...Սուրբ հայր Հովհաննեսի պատճառով բոլոր հայերը լքել էին ինձ։ Միայն պարոն Շահամիրը շարունակեց լինել իմ բարեկամը և արհամարհեց այդ վանականին ու նրա վատասիրտ բոլոր հետևորդներին։ Նա (Շահամիրյանը—Մ. Ն.) պարզապես ցավում էր նրանց տգիտության վրա, որ խաբվում էին այդ խորամանկ և ցածրահոգի անձնավորությունից, անձնավորություն, որի գլխավոր ուսմունքն էր՝ խարդախությամբ չարիք սերմանել և կործանել իր հայրենակիցներին»¹։

Իր ազատագրական ծրագիրն իրականացնելու նպատակով Էմինը՝ երկաթե կամք ունեցող այդ անխոնջ գործիչը՝ նորից անցնում է Պարսկաստան, բայց անհաջողությունների հանդիպելով՝ վերադառնում է Հնդկաստան։ Իր կյանքի վերջին շրջանում Էմինը հաստատվում է Կալկաթայում և այնտեղ էլ մահանում է 1809 թվին, խորը ծերության հասակում։

3.

Էմինի հասարակական-քաղաքական գործունեությունն ունի հայրենասիրական ու ժողովրդասիրական շեշտված բնույթ։ Ջերմեռանդ սեր դեպի հայրենիքը, դեպի իր ժողովրդը, համառ պայքար, անձնադո՛ւթյուն և նվիրվածություն հայրենիքի համար—անա այն հիմնական գաղափարները, որոնք նա և՛ քարոզում, և՛ կիրառում է իր պրակտիկայի մեջ։ Հայրենիքին

¹ Նույն տեղում, էջ 446—447։

ծառայելու նպատակով նա դիտակցաբար կրել է ամեն տեսակի տառապանքներ և հաճախ նետվել է մեծագույն վտանգների մեջ: 1756 թվին լորդ Նորթթրմբերլանդին ուղղած իր նամակում էմինը գրում էր.

«Ես շատ զեղեցիկ նպատակներ ունեմ, որոնց համար շատ տառապեցի: Կարծում եմ, որ ձերդ պայծառափայլությունը չի արհամարհի մի անձնավորություն... որն այդ նպատակների մասին ավելի շատ է մտածում, քան իր ապրուստի մասին: Ես լքել եմ կյանքի շաա հանգիստ պայմաններ և ենթարկվել ներկայի ողորմելի դրությունը. բայց ես չեմ բողբում, եթե միայն կարողանամ հասնել իմ նպատակին... Երբ հայրս ինձ տարավ Կալթա... ես տեսա երուպացիների գործը և ղինվորների մարդանքը, ինչպես նաև նավաբությունը և թե ինչպես նրանք ճարտար ու կատարյալ են ամեն բանի մեջ: Ես ողբում էի ...իմ կրոնի, իմ հայրենիքի համար, ես ողբում էի, որ մենք գերություն մեջ ենք գտնվում, տգետ ենք և հրեաների նման թափառական... Ես որոշեցի գնալ Եվրոպա՝ սովորելու ռազմական արվեստն ու նրան օժանդակող գիտությունները. վստահ էի, որ եթե ես որպես մի երուպացի ոպա գնայի Հայաստան, ապա մեծ չափով օգտակար կլինեի իմ հայրենիքին... Հայրս չսեց ինձ... Ես չէի կարող հանգուրժել անասնական կյանքը—ուտել, խմել առանց ազատություն և գիտություն... Ես դիմեցի նավապետ Ֆոքսին և հարյուր անգամ համբուրեցի նրա ձեռները, մինչև նա համաձայնեց, որ Եվրոպա հանապարհվելու իմ ծախսի փոխարեն աշխատեմ նավի վրա: Չարաչար աշխատանքներ կատարելով՝ հասա Անգլիա. այդ ինձ ոչ մի վիշա չպատճառեց, որովհետե ես միշա մտածում էի իմ հայրենիքի մասին... Եթե ես հնարավորություն ունենամ լուսավորելու իմ աչքերն ու ծառայել իմ հայրենիքին, ապա ուրախ սրտով կընթանամ դեպի ամեն կարգի ստրկություն և վտանգ»¹:

Անգլիացի իր ծանոթներից մեկին՝ տիկին Մոնատագին 1757 թ. մայիսին գրած նամակում էմինն ասում էր.

«Որչափ կյանքի նշույլ կա իմ մեջ, իո պեաք է ամեն ջանք գործ դնեմ, որպեսզի ծառայեմ իմ հայրենիքին. և եթե ես կոչված եմ փրկելու իմ անպաշտպան ազգը, ապա ոչինչ չէ կարող արգելք հանդիսանալ ինձ»²:

Կալկաթայի կառավարիչ Դերեյքին էմինը գրում էր.

«Որքան որ ես կապրեմ, պիտի ջանամ կյանքս ի սպաս դնել հայրենիքիս»³:

Նմանօրինակ հավաստիացումները, որոնք հաճախ կրկնվում են ինչպես նրա ինքնակենսագրական աշխատություն, այնպես էլ նամակների մեջ, լոկ հայտարարություններ չէին: Էմինի հարուստ, փոթորկալից կյանքն ու գործունեությունն ամբողջովին հաստատում են այդ:

Որպես քաղաքական գործիչ՝ էմինն իրեն առաջադրում էր մի հիմնական խնդիր—կազմակերպել հայերի ազատագրական շարժումները, ապատա-

¹ „Life and Adventures of Ioseph Emin“, էջ 58—60:

² Նույն տեղում, էջ 70:

³ Նույն տեղում, էջ 101:

գրել հայ ժողովուրդը պարսկական ու թյուրքական բռնապետությունների ծանր լծից: Ի տարբերություն Իսրայել Օրու, Էմինը գնում էր ոչ միայն Արեւելյան Հայաստանի (Պարսկահայաստանի), այլև Արեւմտյան Հայաստանի (Թյուրքահայաստանի) ազատագրության խնդիրը: Այդ խնդրի իրագործումը նա հնարավոր էր համարում գինված ազատամրության միջոցով միայն: Իր գործունեությունը սկզբնական շրջանում Էմինն արտաքին ուժերի օգնության հարց չէր դնում: Նա կարծում էր, թե ներքին ուժերի միջոցով՝ միայն հայ-վրացական միացյալ ազատամրությամբ հնարավոր կլիներ տապալել տաճկական և պարսկական բռնապետությունների լուծը: Այսօրինակ գործելակերպ առաջադրելով՝ ազատագրական այդ գործում նա առանձնապես մեծ տեղ էր տալիս վրաց Հերակլ II թագավորին: Իր գործունեության վերջին շրջանում արդեն Էմինը նշմարեց այն ճշմարտությունը, որ տվյալ պատմական ժամանակաշրջանում, առանց Ռուսաստանի ակտիվ ազդման օգնության, հնարավոր չէ հայ և վրաց ժողովուրդների ազատագրությունը սուլթանական և շահական տիրապետություններից: Հայկական ազատագրական շարժման կենտրոնական ուժը նա համարում էր Ղարաբաղի (Պամսալի) մելիքությունները և այդ պատճառով էլ նա առանձնապես մեծ ճիգ ու ջանք էր գործ դնում այդ մելիքությունների դաշինքը կազմակերպելու վրա: Ազատագրական շարժման հիմնական ուժերն, ըստ Էմինի, այդ ժողովրդական մասսաներն են: Նա լավ էր հասկանում, որ հայ կղերականությունը դեմ է ազատագրական շարժումներին և այդ հանգամանքը քանիցս հիշատակում է ինչպես իր ինքնակենսագրության, այնպես էլ իր ծանոթներին ու բարեկամներին դրած նամակներում:

Անհամեմատ խոշոր դեմք է Էմինը որպես նոր, երոպական առաջավոր ու դեմոկրատական գաղափարների ներկայացուցիչ, որպես այդ գաղափարների քարոզիչ՝ հայ իրականության մեջ: Ամենայն իրավամբ Էմինը պետք է համարվի հայ հասարակական մտքի նոր՝ բուրժուա-դեմոկրատական, հակաֆեոդալական էտապի առաջին նշանավոր ներկայացուցիչը: Մինչև Էմինը հայ իրականությունը չի տվել նմանօրինակ գաղափարների որեէ քարոզիչ և նա, իրապես, հայ լուսավորիչների սերունդների առաջին ներկայացուցիչն է:

Էմինը, ինչպես այդ հատուկ է ընդհանրապես բոլոր լուսավորիչներին, պատմական պրոցեսի, հասարակական կյանքի հիմնական շարժիչ ուժը համարում է գիտությունը, լուսավորությունը: Այդ միտքը նա կրկնում է շատ անգամ: Հերակլին ուղղած իր նամակում նա գրում էր.

«Այստեղ (Եվրոպայում—Մ. Ն.) ամեն ինչ արվեստով և գիտությամբ է ընթանում: Այն ազգը, որը գիտություն չունի, նա ազգություն չէ, և նրանք, ովքեր անտեսում են այս, կույր են և դժբախտ: Հին հռոմայեցիներն օրենքներ տվին մարդկությանը և նվաճեցին աշխարհիս բոլոր ազգությունները՝ շնորհիվ արվեստի և իմաստության: Ռուսաստանի հանգուցյալ փառապանծ Պետրոս Մեծը չէր կարող լինել այնքան մեծ պատերազմող և չէր կարող իր երկիրն այնքան զարգացնել, եթե չգար այս վայրերը (այսինքն՝ Եվրոպա—Մ. Ն.) գիտություն սովորելու... Կան այնպիսի բաներ, որոնց շնորհիվ երոպական ազգությունները հաղթող հանդիսացան... Նրանց

մեջ կան գիտնականներ, որոնք կատարում են մեծամեծ և հրաշալի գործեր... Նրանք հսկայական ծախսերով ուղարկում են մարդկանց աշխարհի բոլոր կողմերը՝ ուսումնասիրելու բոլոր այն բաները, որոնք արտադրվում են երկրի վրա կամ գտնվում են նրա ընդերքում... Նրանց քաղաքները շատ մեծ են, նրանց ժողովուրդը երջանիկ է... Նրանք կառավարվում են հրաշալի օրենքներով... Թող բարձրյալն՝ աստված ձեր հպատակներին իմաստություն շնորհե հետեւելու նրանց օրինակին»¹։

Այդ նույն և այլ նամակներում էմինը հաճախ կրկնում է այն միտքը, թե «Ինչ որ հիմնված է գիտության վրա... ավաղի վրա է կառուցված»։ Հերակլի հետ ունեցած իր տեսակցությունների ժամանակ (1763 թվին) էմինը, պետությունը հզորացնելու համար, որպես հիմնական միջոցառում առաջարկում էր դպրոցներ բաց անել, պատանեկությանը գիտություն, զինվորական արվեստ սովորեցնել։ Առանց գիտության, լուսավորության, առանց զինվորական արվեստի ոչ մի պետություն հզոր լինել չի կարող — ասում էր նա։

Իր ժամանակի երոպական շատ լուսավորիչների նման՝ էմինը գերադույն ելակետը համարում է «բնության օրենքը»։ Նա գրում է.

«Որեւէ օրենք կամ սովորություն, որ դեմ է բնության օրենքին, ավերակի կվերածի քաղաքները, կամայացնի պետությունները և ոչ մի հետք չի թողնի բացի անապատից, և այնքան ամայի, որ, կարծես թե, երբեք մարդկային բնակություն չի եղել այնտեղ»²։

Էմինը խիստ ոգևորված էր անգլիական կարգերով։ Անգլիայի «եսպուրելիական կարգերը նա կատարյալ էր համարում։ Անգլիայի մասին խոսելիս՝ նա ասում է, թե այնտեղ կարելի է տեսնել «իմաստուն օրենքների և օգտակար կարգ ու կանոնների երոպական սքանչելի սխտեմը»։ Էմինը լայն պրոպագանդա էր ծավալում, որպեսզի Հայաստանում ու Վրաստանում ևս ստեղծեն երոպական այդ կարգերը։

Էմինը խիստ բացասական դնահատական էր տալիս ազնվականությանը, կղերականությանը և վաճառականությանը։ Վրացական ազնվականության մասին խոսելիս՝ նա մոռյալ գույներով էր պատկերացնում նրա դերը վրաց ժողովրդի պատմության մեջ, նրա շահատակություններն ու ճնշումները գյուղացիական մասսաների նկատմամբ, նրա դավաճանական գործելակերպը երկրի նկատմամբ և այլն։ Հայ կղերականության մասին նա հետևյալ մտորումներն էր անում.

«Հասարակ մարդու նկատմամբ շունն ավելի մարդասիրություն ունի, քան եկեղեցական հայրերը, որոնք թյուրքական իշխանության գլխավոր փաստաբաններն են։ Նրանք գիշեր ու ցերեկ աղոթում են, որ մահմեդականների իշխանությունը երկարաձգվի... Խոցված սրտով հաճախ լսել եմ նրանց անեծքն իրենց սեփական հասցեին և գովասանքը՝ իշխող գիշատիչ գայլերի մասին։ Այս տեսակ անխիղճ «բարեկամներով» թնչպես կարող է ժողովուրդն

¹ „Life and Adventures of Joseph Emin“, էջ 110, 111։

² Նույն տեղում, էջ 396։

աղատվել ստրկությունից, բացի միայն այն գեպքից, երբ ժողովուրդը հրաժարվի զրամ հավաքել եկեղեցականների համար: Եթե ժողովուրդն այդ զրամի մեկ քառորդ մասն անգամ ծախսե յուր երեխաների վրա՝ նրանց պատշաճ կրթություն տալու համար, այդ դեպքում հնարավոր է զանազանել բանական էակը բիրտ կենդանուց, բազմացնել լավ տունները և դուրս շարժել ֆնասակար խոտերը: Այսպես միայն կստեղծվի աղատ ժողովուրդը»¹:

Էմինը հողերականներին գառնալզեստ գայլեր է անվանում և ցավով հիշատակում է, թե ինչպես իր հայրենակիցները «երեխաների նման խաբվում են իրենց եկեղեցու «սուրբ հայրերի» կողմից»: Էմինի մոտ խիստ բացասական դնահատականի են արժանանում նաև հայ վաճառականները: Ոռնելով Լադարյանների ժլատության մասին, Էմինը գրում է.

«Եթե հայ վաճառականներն ունենան այն սիրո կեսն աղատության համար, ինչ որ նրանք ունեն դրամի և նախապաշարունների համար, որոնք շատ տեսակետից կործանարար են, վաղուց աղատագրված կլինեին: Սակայն այդ նողկալի նախապաշարունն այնքան տիրապետող է դարձել նրանց մոտ, այնքան է ներթափանցել նրանց հոգու խորքը, ներհոսելով յուրաքանչյուր մկանի ու արյան անոթի մեջ, այնքան է շաղախվել նրանց արյան ու բնավորության հետ, որ, հիրավի, նրանք արժանի են ավելի շուտ հասաբանության կարեկցությանը, քան թե մեղադրանքին»²:

Այդ նույն հարցի մասին մի այլ կապակցությամբ Էմինը իր ինքնակենսագրականում ասում է.

«Էմինը... յուր հայրենիքը փրկելու հուսով քանի՜-քանի անգամ վտանգել է իր կյանքը: Բայց, ափսոս, դրանք ապարդյուն անցան, որովհետեւ մի կողմից հարուստները միայն ամուր գրկել էին իրենց դրամի քսակները, մատեցնելով դրանք, որքան հնարավոր է, իրենց թշվառական սրտերին, իսկ մյուս կողմից՝ եկեղեցու կես աստվածները մեռցրել էին աղատության հավատքը»³:

Էմինը խիստ կսկիծով է խոսում արևելքի կնոջ ծանր վիճակի մասին: Նա ասում է.

«Գեղեցիկ սեռի հանդեպ ասիացիների վերաբերմունքն ուրիշ ոչ մի բանի հետ չի կարելի համեմատել, քան միայն դիվային վերաբերմունքի»⁴:

Բաղմականությունը, որ թույլատրվում է օրենքով, ըստ Էմինի՝ չարիքների և կնոջ ստրկական վիճակի աղբյուրն է հանդիսանում:

Էմինի լուսավորական-դեմոկրատական հայացքները, սակայն, աղատ չեն կրոնական իդեոլոգիայի ազդեցությունից: Նա աթեիստ չէր, իհարկե, և իր լուսավորական, առաջավոր գաղափարները շատ հաճախ հիմնավորում էր

¹ Նույն տեղում, էջ 157:

² Նույն տեղում, էջ 198:

³ Նույն տեղում, էջ 320:

⁴ Նույն տեղում, էջ 396:

կրոնական փաստարկումներով, մի բան, որ հատուկ էր նաև 18-րդ դարի երոպական լուսավորիչների մի մասին:

Էմինի մասին հիացմունքով են խոսում նրան ծանոթ ժամանակակիցները: 1757 թվի դեկտեմբերի 14-ին կոմս Բենտինքին ուղղած իր նամակում Ս. Ս. Էգերարն Էմինի մասին գրում էր.

«Ազգությամբ հայ է նա, հայրը վաճառական է Կալկաթայում: Տեսնելով երոպական արդյունաբերության գերազանցությունը նավային և զինադործության ասպարեզում՝ նա համոզվում է, թե հնարավոր է, որ ինքն էլ սովորեալ դրանցից այնպիսի մի արվեստ, որով կարողանա ազատել կամ առնվազն ծաղկեցնել իր հարազատ ժողովուրդը: Այո հիանալի ծրագիրը մինչև այժմ հետապնդել է բացառիկ հաստատակամությամբ և հաջողությամբ: Այժմ նա դնում է Հոլլանդիա՝ այցելելու իր հայրենակիցներին... Յանկանում եմ ներկայացնել ձեզ մի մարդու, որը շնորհիվ իր արտակարգ բնավորության և փորձված արժանիքների՝ մեծ մարդկանց ուշադրության առարկա դարձավ Անգլիայում»¹:

Էմինին անձամբ ծանոթ տիկին Մոնտագն իր նամակներից մեկում նրա մասին գրում էր.

«Այս սքանչելի մարդու համար պետք է վերապահված լինեմ ավելի փառավոր աթոռ, քան պարսկական դահր: Նա ծնվել է ստրկության մեջ և սնվել է սոփիստության մեջ, սակայն տեսնում է ազատություն, գիտություն և կուլտուրականություն տալ իր հայրենակիցներին: Այս բոլորն իրագործելու համար նա վտանգի ենթարկեց իր կյանքը, կրեց մեծագույն առաքանքներ և նետվեց ամեն տեսակ վտանգների մեջ, այնպիսի մի երկրում, որի լեզուն անգամ անծանոթ է նրա համար»²:

Էմինի մասին ոգեբուրության ու հիացմունքով է խոսում նաև անգլիական հայտնի հասարակական-քաղաքական դործիչ Էդմոնդ Բլեքը, որն Էմինի մոտիկ ծանոթներից մեկն էր և նամակագրություն ուներ նրա հետ:

Էմինի գաղափարական ազդեցությունը խիստ նկատելի է հայ լուսավորիչների հնդկահայ սերնդի հետագա ներկայացուցիչների վրա: Մովսես Բաղրամյանի, Շահամիր Շահամիրյանի և անգամ Մեսրոպ Թադևոսյանի մոտ կրկնվում են Էմինի շատ մտքերը՝ գրեթե նույնությամբ:

Մեր դրականության մեջ փորձեր են եղել Էմինին պատկերացնել որպես արկածախնդիր, բախտ որոնող գործիչ (տես, օրինակ՝ Մակար Կպիսկոպոս Բարխուդարյանցի «Պատմութիւն Աղուանից» աշխատությունը, Լեոի «Հայոց պատմութիւն», նորագույն շրջան, ապակետիպ): Այդօրինակ տեսակետին հանդիպելը դարմանալի չէ: Հայ կղերական ու բուրժուական պատմագրության սխառմը և տրագիգիան է եղել ընդհանրապես՝ սովեր գցել, սև գիծ քաշել հայ ազատագրական շարժման, հասարակական մտքի լավագույն ներկայացուցիչների վրա, ներկայացուցիչներ, որոնք խիղախել են պայքարի դրոշմ բարձրացնել հայկական խավարամտության և նրա ամբողջ հան-

¹ „Life and Adventures of Ioseph Emin“, էջ 89:

² Նույն տեղում, էջ 85:

դիտարկող էջմիածնի կաթողիկոսության դեմ: Հայ բուրժուական պատմագրությունը մոռացության է մատնել էմինին: Մարքսիստական մեր պատմագրության կարևոր խնդիրներից մեկը պետք է լինի, ընդհակառակը, հանդամանորեն լուսաբանել հայ հասարակական մտքի և աղատագրական շարժման այդ փայլուն ներկայացուցչի կյանքը և լայն մասնաների սեփականությունը դարձնել այն:

ИОСИФ ЭМИН

(РЕЗЮМЕ)

Изучение жизни и деятельности виднейшего армянского общественно-политического деятеля XVIII столетия Иосифа Эмина привело нас к следующим выводам:

1. Антифеодальная, буржуазно-демократическая идеология в армянской действительности зародилась в 50-х годах XVIII века под влиянием западно-европейской, главным образом, английской передовой мысли того времени. Первым представителем этой армянской просветительской идеологии был Иосиф Эмин (1726—1809). С него начинается этап буржуазно-демократических, просветительских идей в истории развития армянской общественной мысли. Поэтому надо признать ошибочной господствующую до сего времени как в нашей историографии, так и в литературоведении и остающуюся пока без возражений точку зрения, что армянская просветительская буржуазно-демократическая идеология будто возникла лишь в первой половине XIX века.

2. Армянская просветительская идеология второй половины XVIII века имеет ярко выраженный характер политической, революционной борьбы. В этот период первоочередным вопросом являлось освобождение армянского народа от персидского и турецкого ига путем вооруженного восстания. Это обстоятельство наложило глубокий отпечаток на армянское просветительство. Именно поэтому Иосиф Эмин, как и другие армянские просветители второй половины XVIII века (Мовсес Баграмян, Шагамир Шагамирян и др.), являлся не только просветителем, но и крупным деятелем освободительного движения.

3. Иосиф Эмин оказал огромное влияние на ряд представителей старшего поколения армянских просветителей. Так, например, множество идей Эмина почти без изменения можно найти у Мовсеса Баграмяна, Шагамира Шагамиряна и даже у армянского просветителя первой половины XIX века Месропа Тагиадяна. Армянская политическая группа в Мадрасе (Шагамирян, Ходжаджанян, Баграмян и др.), проявившая в 1770—1790 г. г. большую работу в деле организации армянского освободительного движения, была создана при активном

участии Эмина и под влиянием его идейной и политической деятельности.

4. Эмин был самым ярким поборником политического союза, братского единения армянского и грузинского народов в XVIII веке. Одной из основных целей его политической деятельности было установление прочного братского союза между этими народами, связанными общностью исторической судьбы, для совместной борьбы за их освобождение от персидского и турецкого ига.

5. Роль Эмина чрезвычайно велика как в истории развития армянской общественной мысли, так и в истории освободительного движения армянского народа.

М. Нерсисян